

四庫全書

集部

欽定四庫全書

息園存稿詩卷十三

明 顧璘 撰

七言律詩

殘臘書懷復殷文濟

江上故園松菊荒歸來高卧舊茅堂
頗憐脩竹新移雨遂有疎梅迥破霜
原憲豈知貧是病陶潛元倚醉為狂
肯携碁局時相訪未乏清風助晚涼

正旦偶興

斗柄東迴耀碧天
山林欣度漢文年
鄉風一醉屠蘇酒
王政三垂琬琰編
日抱海霞通曙早
花融城雪占春偏
已聞雲物書祥兆
野老從今且晏眠

十三夜試燈和南原

畫障銀燈照夜初
月華如雪滿庭鋪
烟橫巷陌迷行馬
春入池塘起睡鳬
文雅風流仍舊社
太平恩澤在皇都
祇慙勝日淹佳客
除却清歡一事無

徐君叙宅與諸君懸燈賞梨花

銀燭高懸玉樹寒，素花流影晃朱闌。
驚看月出層柯裏，惡說風吹一片殘。
絃管橫催春爛漫，房櫳斜見雪檀欒。
明朝此樂知難續，莫惜殷勤醉後看。

和龍致仁秣陵山庄

負郭青青二頃田，荷蓑驅犢下東阡。
貧資禾黍成婚嫁，老伴漁樵度歲年。
陶令祇知歸去樂，稽康無奈性情偏。
悠悠一水東城下，已得吹簫夜放船。

壽趙雪巖

五月五日夏令分白頭賓客壽田文榴花弄色明深樹
竹葉邀惟到夕曛棋局不輸安石墅墨華長滿阿欣裙
江南勝比燕京樂令子無勞望白雲

過蔡九達鷄鳴寺客舍承詩見謝率爾奉答

高人學舍無官事依舊幽栖坐碧山永日讀書雲閣靜
新晴開戶蘚花斑李膺未仕多推引蔣詡何人數往還
桃竹詩筒勞枉贈丹崖瓊樹迥難攀

送伍中丞還石首

拂袖金門不可招，中丞清節楚山高。
西江義旅雙龍劍，南國干城一豸袍。
九鼎銘功藏石室，孤舟垂釣入雲濤。
丈夫出處俱無忝，銀漢遙瞻彩鳳毛。

和文濟遷居二首

大隱何勞訪碧岑，帝城佳處即雲林。
陰陰柳覆溪門靜，宛宛鶯啼竹塢深。
安石東山堪獨卧，孔明梁甫莫悲吟。
鳳臺雪霽多佳景，不負扁舟五夜尋。

碧烟虛檻樹千章最愛疎桐掛月光勝地別開碁局墅
仙人新住水雲鄉西隣脩竹青稍細南郭羣峯翠黛長
閉戶注書稀出入莫言門外有風霜

次華泉早春鳳凰臺

古臺誰見古人遊臺下秦淮今自流鳳鳥不來空故國
梧桐千載倚荒丘雲間雪霽芙蓉殿江上春生杜若洲
聖代登臨多樂事側身天地更何愁

送彭給事汝寔奉母夫人還蜀

灝瀕霜乾石道微南舟安穩奉慈闈江魚白白供行饌
峽樹蒼蒼媚采衣華國文章多麗藻過橋車馬盛光輝
朝廷褒職須公補且莫山中戀薜薇

鄭作至問訊空同

北里築居何歲成南山種豆苦逃名百年丘壑真長往
千里驂騑羨獨行每見披裘過道路漫聞揮翰動公卿
神仙竟合邀中散婚嫁何勞問向平

送林貞孚還閩

北闕上書何所求
南宮卧病脩經秋
祗緣禮樂須幽討
豈謂雲霄竟薄游
江漢趨庭宜彩服
乾坤高枕對滄洲
承家未止今方岳
司馬流風蓋九州

送吳與成會試

瘦馬孤裘犯雪風
青年文藻動南宮
誰應避舍推蘇軾
已忝通家識孔融
燕市醉歌春未遠
吳門高論夜還同
臨行把贈干將去
共惜池陰老劍工

次南坦同白巖公登蒼巖聯句

蒼巖高出太行顛下瞰南州數點烟海外忽來玄鶴駕
人間重見白雲篇行藏玉雪誰相染咳唾珠璣竝可傳
不向山林瞻氣象豈知臺省有神仙

遊故相守溪公園亭

見中舍君
新栽花木

丞相園亭舊數來平泉花木後重栽武陵桃花逶迤轉
太華蓮峰綽約開月出衆賓俱酩酊雲移高閣更徘徊
門墻惠澤思無盡踏遍三槐樹下苔

陳君汝璧自永嘉來南都省其伯兄摠戎公且締

新婚

愛弟新從東越來
塤篪聲徹鳳凰臺
他鄉棣萼生春興
故苑楊花攪別懷
幕府眠雲應共被
皇都覽勝幾啣盃
風流將種真無忝
看取金屏射雀才

送祝時泰守思南

朱轡南去領提封
清代蠻荒聖澤濃
雲轉舟車通萬里
烟含城郭擁千峰
印臺地重蹲金虎
劍匣塵清卧玉龍
尚有經綸需大用
不妨吟嘯暫從容

會陳亨父

西園虛閣對高林
閉戶焚香養道心
勝地幾年頻悵望
歸帆千里一開襟
雲深獨鶴蕭蕭舞
海近寒龍細細吟
明月倚闌無限興
莫因人世歎浮沉

十一月五日同子魚風雨舟往治平寺訪履約履
吉

伍胥城東月映樓
越王橋下雨隨舟
石湖噴薄魚龍氣
水國霑濡鳥雀秋
竹逕松房人隱隱
酒杯香篆夜悠悠

平生白首相知侶對宿空山興轉幽

唐京兆應韶侍母夫人還楚

太君歸棹下清虛京兆承歡奉起居
千里遙將春色去一封偏荷寵光餘
桃花夾岸明衣繡荇葉浮江簇饌魚
莫傍庭闈懷定省都亭竹馬待還車

送郝武庫元洪入京

三年帝廐閑驕駮一日天書降鳳凰
時論同歸小司馬朝班重識舊鴟行
風神玉雪窺清潤文藻江山助渾茫

豪俊從來須大用看君飛步入巖廊

宜興謁東坡祠

學士祠堂傍水局蜀山蕭索向誰青歸魂省識毘陵道
好事空傳楚頌亭萬古雲霄瞻氣象滿林風雨護精靈
湖東月出光如許照見燕山相國銘

寄陳宗禹中丞

暫下烏臺短鬢青楚南新望少微星書成自去臧衡獄
月出時聞釣洞庭江海澄清風憲體松衫天矯歲寒形

空慚叔夜非儔侶漫點封章誤主聽

送劉叔正憲僉入蜀

巫峽巫山霧雨蒸繡衣持斧下青冥從來直道非時好
況復高文絕代能野鶴昂藏寒自警海鵬寥廓氣彌騰
諸生鼓篋江南北泰嶽雲高望不勝

壽鄭戶部唯東母夫人

北堂酒浮金爵光東曹帶繫銀魚長栢舟節操冰霜迥
翠翟威儀錦繡香列鼎端居餘慶澤稱觴詞客盛文章

從今老福如川湧看列孫枝玉樹行

對雪二首

千峰急雪灑茆簷久旱微陰冷亦堪獨賴諸公憂凍餒
不勞明主顧東南高標一任寒梅得餘潤偏宜宿麥含
薄暮倚欄看絮舞鬢絲相伴兩鬢鬢

孤城日落雲垂幕大地陽回雪舞花采石江濤冰硯碣
蓬萊宮樹玉橫斜清光恍徹三千界朔氣平侵十萬家
半夜兔園賓客醉擁爐揮翰氣成霞

贈王司寇乞養歸台南四首

王舊尹
應天

千巖萬壑乞閒身
風節分明見古人
愛下更無包孝肅
戀親誰似范純仁
天顏咫尺傳優詔
海角逍遙理釣綸
明發都城新雪霽
甘棠何限總含春

抗疏曾聞動武皇
一麾迢遞過沅湘
青冥直氣干星斗
白首孤懷映廟廊
韓愈歸朝公望重
王陽辭阪聖恩長
行藏歷歷俱無忝
拭目台南皎日光

脫身霄漢賦閒居
暫息鵬風九萬餘
母氏在堂思戲采

人生當路幾懸車燒丹試鑿皇華井閉戶應脩禹穴書
料得晨昏調鼎味長將竹笋膾江魚

天台石梁天下奇龍湫鴈蕩碧逶迤平生蠟屐今方用
向老奚囊每自隨海浸樓臺雲五色洞藏花竹露千枝
知公此去能高卧祗恐商王起夢思

贈張秋厓虞卿

柴門風雪印行踪竹杖新辭鴈宕峰中散獨行如野鶴
老聃一見是神龍英雄蹭蹬誰青眼道德希微又赤松

欲撥紅塵攜手去匡廬石上話從容

送金子有陳羽伯春試

久拋鉛槧伴樵漁二妙年來謝起予
粲爾鄉邦生鸞鷟居然清廟對璫璵
辭家並赴看花約理國無忘種樹書
天子祗今過舜禹許身千古欲何如

上邃翁壽和文濟二首

鵠立鵬搏五十春玉階搖珮上星辰
黃扉大業闢元化白首孤忠動鬼神
壽亞潞公凡幾歲名齊溫國竟誰人

紛紛寒士歌恩澤厚祿千鍾祇自貧

玉燭均調四海春風雲嘉會慶茲晨朝廷禮樂前無古
臺閣文章妙有神寶厯天長遺大老金門地迥隱仙人
休憐道貌殊清峻夙夜常憂白屋貧

與陳石亭雪後遊牛首山

隆冬季月歲云徂策馬牛山興不孤削壁倚空雲點綴
古松沿澗雪模糊堂垂塔影傳靈怪人轉巖腰學畫圖
形勝江南無可比武皇龍駕合踟蹰

遊花巖

風林下馬叩龍宮雪磴扶筇踏虎蹤
把酒峰頭看海月開門庭際俯雲松
鐘聲夜傍諸天動巖翠寒交萬木濃
苦說移家身已老暫來猶自未從容

和望之中丞春日對雪二首

春風拂拂自東開春雪盈盈落鳳臺
江柳破寒先舞絮宮花應候盡粧梅
霏微向日相矜媚輕薄迎風却倒迴
野老茆齋方卧穩叩門休報大夫來

大壑春生冰欲開青皇將雪下瑤臺先教潤澤甦原草
故送清寒勒野梅鳩鵲雲高鴻影度盧龍江動練光迴
東郊前日迎春侶裘馬翩翩射鹿來

己丑元旦和陳京兆祐卿

不上王侯典謁牋獨吟風雪度新年柴門絕跡無車馬
秫酒陶情謝管絃却老自泥燒藥鼎求閒何待買山錢
喜聞京兆寬租稅白日沉沉祇醉眠

送姚文進秀才迎婦

三傳精華已徹微少年文采眼中稀
龍駒得水呈圖出鳳侶迎春入鏡飛
內館芙蓉生綉褥後庭萱草待班衣
由來骨相非凡種日下人當薦陸機

春日遊高座寺二首

佳辰聘望給孤園白袷初成氣候暄
春日漸添風物美空山真隔市朝暄
歌催酒盞當筵急坐愛花枝滿目繁
眼底同君聊一醉吳臺梁苑底須論

花發其如逸興翔春山醺酒惜年芳
臺高忽見江流近

寺古惟聞松栢香並遊驕馬花邊去獨轉新鶯竹裏藏
尋壑經秋共忘返還憐白日轉添長

和望之惜園花盡開之作

十日春晴花盡開一年春事半莓苔疎枝密萼相將盛
粉蝶黃蜂莫浪浪漫舉金杯當月榭誰吹玉笛傍霜臺
芳菲未忍隨流水遶樹攀條意獨哀

吳太宰新堂初成有鵲來巢

相國新開綠野堂堂前靈鵲早呈祥來依喬木營門戶

欲傍青雲化印章，幽砌頗宜迎客噪。
高簷何礙順風翔，雕梁畫棟相鮮地。
最愛詩題素壁光。

春日顧吏部武祥張兵部惟靜攜酒過息園重辱
佳篇漫謝一首

清溪竹逕久荒蕪，二仲逢春試玉壺。
即有荆花當戶紫，更多萱草映堦鋪。
衰顏屢喜依瑤樹，秀句時驚落蚌珠。
高駕往來殊不惡，莫因踈懶厭潛夫。

壽姜節舉人父母

七十二峰如列戟太湖深護隱君廬家貧菜婦能逃祿
身老龐公不著書生理剩栽巖畔橘肯甘時薦舍前魚
青春令子方騰踏雲路遥乘駟馬車

贈朱銘甫還松江

太學賢名衆不如九峰歸省老尚書才華獨擅三都賦
門閥重高駟馬車吳苑天寒收橘柚松江霜落薦鱸魚
遥知彩服趨庭後讀畫家藏萬卷餘

送陳子文赴廣西

八桂西瞻岳牧尊使君持節下湘源
星巖風洞山殊秀雪片霜華地不暄
永日賦詩薇閣靜青春行部繡旗翻
從來遠地多名宦銅柱猶聞頌馬援

送陳京兆祐鄉還南海

疏傅懸車緣底事溫公避位本初心
蛟龍遠適江湖性鸞鳳高辭枳棘林
多病逢人求大藥有懷浮海發孤吟
移家勿向羅浮住使者來徵恐莫尋

西爽草堂

草堂寄在國門陽西嶺蹠迴入戶蒼含雲洞壑泉臺迴
礙日松梧露逕長歲歲采蘋脩俎豆重重栽竹護垣牆
南州高士今難作唯聽慈烏弔白楊

送王文光宰定海

曲江落羽人皆惜東海分封衆所榮喜見疲民投父母
願因明主致昇平花間草長逢馴雉谷口春歸聽早鶯
看取漢家循吏傳獨憐卓茂最知名

孟中丞命酒息園集諸文士賦一首

山人避俗野園開
憲府邀懽載酒來
浮杯豈讓山陰會
授簡還徵鄴下才
暫遣閒雲依紱冕
更呼明月照池臺
錦筵爛漫唯須飲
畫燭闌珊未擬迴

登清凉寺後西塞山亭四首

霄漢秋高烟霧開
舊京西望一登臺
皇居迴映鍾陵起
海水遙吞鵲鎮來
半嶺顛風頻落帽
孤亭斜日更啣盃
乾坤轉盼皆陳跡
況復浮生白髮催

晚上高亭對落暉
萬山寒翠濕秋衣
江流一道杯中瀉

雲樹千門鳥外微古寺頻來僧盡老重陽欲近蟹爭肥
霜楓惡作蕭條色故弄殘紅繞客飛

山閣難禁宋玉悲六朝遺恨滿殘碑青山自擁蟠龍勢
玉樹空傳落燕詞寒節授衣傷老大醉鄉隨鍾愧支離
歌筵舞妓非前代文采風流又一時

劍化人亡有故城東來海氣帶龍腥煙花樓閣三千界
錦繡河山百二形老托神京堪自隱醉眠秋澗不知醒
長江只在朱闌外莫遣哀歌動杳冥

梅開答孟中丞厭客之嘲

驄馬能過問野梅柴門何惜向陽開
空勞野客巡簷笑
實少高人載酒來
地僻誰懷元亮宅
月明深負謫仙杯
須知竹下三三逕
本為招邀二仲裁

和許隱君游西湖

千峰萬壑斷飛埃
百頃湖光演漾開
大塊丹青隨意得
炎天水雪傍舟來
不禁楊柳牽衣袂
況復荷花近酒杯
曾是君王遊賞地
采雲猶護舊歌臺

拜岳武穆廟

水白雲青廟貌明墓門喬木盡南生天高竟吼三人虎
國破誰推萬里城望斷白龍無死所歌殘黃鳥有餘情
海波東去厓山遠精衛千年恨未平

文徵仲翰院約遊西湖不至次韻奉嘲

懷君不見動經年有約猶慳訪戴船草閣自含懸榻愧
蓮舟終少聽歌緣徒聞避俗稱高士未必尋幽損大賢
落日倚欄空佇立海山千點澹蒼煙

和許隱君留別

丹山碧水古王城處處登臨滯客程
幽壑風煙須縱酒暮年朋舊獨關情
勞生苦覺滄洲遠別路空餘白髮明
客裏送君秋又至臨歧休怪旅魂驚

天真寺訪薛尚謙因懷伯安王尚書

江邊寺裏為君來絕壁高亭對酒杯
萬里海波衝鳥落半天風雨挾龍回
蒼松解引尋真路宿草空傷濟世才
莫上書堂歌伐木寒泉鳴咽使人哀

湖寺觀雨

濕雲吹墨濺湖波
急雨翻盆落澗阿
江郭衆山當面失
寺門孤樹奈風何
浮生白髮餘高興
暇日清尊且浩歌
蓑笠醉歸還自笑
晴天曾得幾回過

和劉光祿觀潮

江樓再上思前事
十度流年指一彈
滿目波濤還自至
舊時賓客不同觀
玉龍氣湧澄江動
雪練光搖大海寬
欲挽靈槎上霄漢
祇愁風露弄秋寒

遊三竺後暮泛西湖歸城呈汪按察

風度疎鐘出萬山，天成樓閣挂巖間。
松林落日暉暉白，石澗幽花細細斑。
脩竹禪房堪載酒，亂峰雲樹暫怡顏。
蘭舟蕩漾西湖水，悵望嚴城暮始還。

雲居送蔡武庫赴南曹有懷故國

雲寺迢遙來送客，松關繚繞不逢僧。
堪憐把袂臨秋草，轉愧齋心對佛燈。
旅況鄉愁依去棹，月華風影亂寒藤。
高巖總是銷魂地，天畔危欄莫盡憑。

思歸和劉介夫中丞

寒月滿天鴻鴈飛中宵獨立明星稀
棲遲東省愧官俸
悵望西湖思釣磯
采服家園三徑遠
白頭天地一身微
才迂歲晚竟何補
早晚孤航江上歸

息園存稿詩卷十三

欽定四庫全書

息園存稿詩卷十四

明 顧璘 撰

五言絕句

春日郊行三首

條風曳微雲
山色差可美
日出湖上行
春光滿湖水
麥隴搖新葉
梅塘泛落花
前村天欲雨
雲裏見人家
白石明春泉
蒼林暗春霧
馬蹄從東來
失却山間路

寄楊太康

明月生遙岑，清光轉華薄。
樓上憶君時，秋風動羅幕。

送客歸吳

草際日華淡水邊，雲意閒翩翩。
五陵客騎馬入秋山。

與陳魯南

浮雲淡秋水，落日橫暮山。
與子有幽抱，時在山水間。

幽人

竹靜風已歸，亭虛雲自過。
幽人了無事，坐玩閒芳墮。

詠扇畫寄諸故人八首

詠松寄喬白岩光祿

青松高千尺知是何年栽獨有憇陰者時為清風來

詠山水寄易後齋進士

故鄉宛如昨近郭多池臺一別同心侶無因數往來

詠葵寄郭東厓侍御

花色亦何貴畫葵愛葵心豈無桃李顏要非君所欽

詠芙蓉寄張南園太常

旖旎芙蓉花蕩漾木蘭檝相思隔湘水欲採不可得

詠菊寄潘團山侍御

寂寞東籬下幽花裛露黃自緣寒節至不是愛秋霜

詠桂寄王陽明主事

明月皎如銀中有丹桂影懷人坐良宵衣裳露華冷

詠芍藥寄李崆峒郎中

春芳已搖落一枝開庭陰遲暮不自惜東風詎知心

詠菊寄何白坡中舍

寂寞三徑下亭亭帶晨霜行人愛嘉色君子懷清香

夜汎

四冥波浩浩一葦向空渡月近星斗寒始識天上路

憶殤女

愛盡哀還積年踰恨未除空堦殘日裏愁見舊羅襦
客裏維舟夜懷中拜月明邇來三五夕見月倍傷情

衡山雜畫二首

巖壑飛塵絕孤亭壓水雲偶來乘野興非是厭人羣

雨霽春湖濶扁舟坐不還放情親白鳥覓句贈青山

葉澄雜畫四首

雪積千山素行歌履跡穿腰間有樵斧猛虎莫當前
釣竿青嫋嫋孤影照雲汀莫遣青天上浮光動客心
古琴調古調今人誰愛聞獨往山中去因聲寄白雲
平湖瀉明鏡上有脩竹林把酒對山月誰同秋夜心

和張水部雜咏八首

柳溪

春雨夜來急溪流朝已深
柳絲搖淺綠垂影到波心

檜徑

蒼檜夾芳徑
蒼情饒佳色
霜天獨不凋
然後知爾德

看竹

水曹愛看竹
一日分幾時
我冠不須著
美酒聊自持

蕉雨

高葉戰風雨
歷亂不堪數
詩思與翩翩
坐深良獨苦

荷風

栽栽紅粉粧冉冉出清津風來忽倒垂照見新蓮子

水亭

清溪坐來澄白鳥望中度酒熟無人開詩成有神助

江樓

野望面蒼茫海思坐超越雲生鸛鶴林日射蛟龍穴

魚陂

朝却新藻遊暮託於道息幸無涸轍憂不望監河澤

和見素林公雲莊雜咏八首

英英巖際雲相將
庇幽獨育風自震蕩
慎勿憾我屋
朝暮耕鮮雲結子
如黍密煮作山中飯
還共山人食

孝思亭

苦心日宛轉
九原竟寥寞
服盡淚隨盡
此道今人薄
高風亦有隳
明祀亦有匱
千秋萬苦心
直與雲山對

見素洞

白玉開洞房
藥田元氣濕
老龍雨四海
向晚隨雲入

臨滄亭

隔海望三山銀濤立青壁神遊挾飛仙玩弄扶桑日

三影池

三峰峭而尊凝神入虛靚青天動光彩滅盡浮雲影

隱屏

石屏在巖幽不習見冠蓋時有明月期散髮坐相待

贈嚴別駕

春到鶴林寺川鵲花最紅使君幽興劇獨步問東風

蕭侍御麗川雜詩三首

曾行麗川路解道麗川景山停鸞鳳形水動魚龍影
星巖七曜麗風洞四時秋玉壺搖小艇日日醉中流
羣峰夾江流十里餘百折春來詩興多鑿遍千巖石

秋霽會王履吉朱振之諸君

良友四方至秋月此宵明斗酒集虛館踟躕無限情

秋海棠

陰葉翠瑤濕薄英紅粉香絕憐秋苑下復爾見春光

蘭

幽蘭兩三花清香暗中起日暮望美人盈盈隔湘水

畫竹

陰叢含雨氣燥葉領風聲即是圖邊見猶令客况清

書畫上二首

平江浮夜色遠鴈帶秋聲渺渺孤帆去前山月正明

微風被芳渚旅蒲亂如髮為問紅蓮花含香待誰發

題畫二首

吳山碧相續具區深不流孤舟行薄暮短髮照清秋

野曠平巒小雲寒古木垂自緣詩思苦非關歸騎遲

雨山圖

雲滄雨翻盆千厓互吐吞歸人愁路窄切莫近黃昏

鳳仙花

碧玉青樓女盈盈粧粉紅不應試醺甲翻令妬守宮

倦繡美人幃

罷繡非關暝含愁詎為春祗恐燕臺下花月解留人

白蓮便面

玲瓏白玉簪置在翡翠盤清池明月夜怪爾生秋寒

史知山納妾以翠珉簪為賀

碧玉雕螭簪鮮於翡翠毛美人春夜飲芳暈漬櫻桃

定公房小畫二首

斷來東海骨長惹老龍爭寫作如來供猶含風雨聲
洗盡塵埃色湘江暮雨餘誰將明月影留照草堂虛

對菊

野客愛寒芳經旬再舉觴名花不在色美酒獨宜香

七言絕句

阻淺撥悶十首

船腹沉泥尾生圻風日更燥莫禁當鷓鴣鵲喜川涸
灘上呌魚來去狂

白晝風號夜不休那能寸水為人留千艘並注江湖想
萬室兼懷雲漢憂

上閘閉水絕涓滴下閘水生輒復開我舟公然閣平地
碧波銀浪曷從來

七十二泉元自多水曹疏導力如何宋公不作陳老死
沙滿涓涓黑馬河

尺水無柰衆相爭大官高扁鼓先鳴估人漕卒且安坐
勿謂爾曹舟重輕

萬方舟楫赴天門表頌椒宮慶至尊海若縱無波泛轍
雲師須遣雨翻盆

三日不下一閘門幾時端可到清源老夫白飯尚可飽
漕卒赤拳誰可論

正月樓船發古杭三春殂棹汶河傍未愁綠酒追行樂
却恨班衣遠故鄉

吳苑出門春草萋汶川行色杳依依故園薔薇絕堪賞
候水阻風歸未歸

岸頭古柳綠絲輕傍石繫舟非我情黃鸝不知客愁思
時來底枝送春聲

苦熱絕句十首

齋中五月暑太甚縱到天南知不如豈是衡山移岱嶽

東蒙分與祝融居

作書海上訊龍公耐可停舟烈日中天外洗塵須法水
波心清暑借離宮

家住江南古帝城江風長夏遶門生不知頭白緣何事
兩月官舟觸夜行

迎風觀上天如水寒露臺前月似霜好待甘泉新賦就
待歸此地獻君王

原塵勃勃草全稀林木炎炎鳥不飛縱酒須逃十日飲

乘風那挂一絺衣

赤雲西擁火為峰紅日東驅燭作龍
聞道峨眉多積雪
若為飛去蔭長松

周武殷湯在眼中今王聖德古人同
禾枯即灑桑林雨
道暘仍噓柳下風

西照人家晝掩門船窓渾是暑風屯
清川沸作湯池熱
涼樾蒸為火樹繁

雲中夜滴金莖露天上冬藏玉井冰
安得九重憐肺病

一時傳賜解炎蒸

葵扇桃笙湘竹床捲簾高卧汗如漿何如赤鯉澄波冷
不及玄蟬密樹涼

積雪樓上把酒四首

高樓映雪雪生光雲外神仙白玉堂枉殺相如新賦就
定從何處謁梁王

雪滿空林萬木寒玉峰巉巖倚樓看銀瓶酒綠袞裘熱
六六文窓夜不關

樓上題詩滿硯冰
城頭殘雪晃踈燈
瑤臺月白青雲冷
下有寒潭漾列星

啾啾寒雀拂簷來
楫杓爐深欲作灰
雪上紅纓高大過
王孫西去獵黃臺

公宇納涼四首

庭樹重重拂院西
更無殘日透簾闌
胡床一片堪吟嘯
却付餘陰衆鳥啼

散髮乘風怯病身
出門途路觸黃塵
每愁入夏妨高興

不似青春解著人

跋涉山谿氣鬱馱日中生恐鬢毛焦南薰忽借閒庭爽
羽扇冰漿總不消

不愁赤日遠簷來但取清風灑面開塵事盡拋心似水
使君何必愧無懷

偶題

雲連樹色千嶂合雨挾泉聲一道飛儘有山林溪澗趣
好將佳境暢天機

舟入天津

天際亂山橫暮靄水邊喬木起秋風
扁舟欲過聊停棹明日京塵便不同

村居

山回水合樹成村不是桃源是鹿門
但有扁舟能送酒莫言人世五侯尊

再過仲木舍對菊四首

舊摘黃花半已稀重來相對莫言歸
蘂罌綠酒深如海

判取新霜點客衣

陶令舊無栽秫地
杜陵新借浣花堂
白衣綠酒今重至
翠蓋金錢晚更芳

歲寒心事特相親
莫恠留連倒葛巾
夜半苦吟寒燼落
錦屏愁殺按歌人

露渚芙蓉次第殘
風林桂樹不勝寒
青霜素月蕭條地
獨有黃花耐晚寒

月夜飲九峰山人快園二首

露橋霜榴接葉存古藤修竹覆階繁誰家池館深秋後
能遣高歌盡玉尊

桂樹檀欒蔭小山夜深留客不知還池頭月起光如鏡
更為殷勤照醉顏

臘江同蕭侍御作二首

笑共江妃採采霞錦袍乘月坐浮槎桃花兩岸知何處
中隱秦人數百家

聖主乘龍日好文高賢簪笏起青雲長才漸入麒麟畫

雅興猶懸鹿豕羣

同黃叅軍登巾子山二首

上客牽蘿到石門
老僧分澗引瓠尊
青山萬點浮東海
落日憑闌望不昏

一上高亭野興幽
坐憑松頂瞰江流
海中樓閣三山霽
天畔風烟六月秋

康谷道中見梅花

萬木蕭條積雪寒
空齋愁坐歲華闌
春風十日知多少

已得梅花道上看

鷄鳴寺訪錢元抑遇雨

觸熱尋君汗似漿
坐依高竹掛冠裳
濃雲忽送空林雨
人與青山相對涼

夜泛菴溪

銅棺山月二更生
晷畫溪流百里平
一夜棹歌歌不盡
倚蓬斜坐到天明

自荆溪問道往錫山

荆溪一水逶迤去震澤羣峰歷亂來縱使路迷都莫問
秋光隨地可啣杯

京城西湖漫賦

萬頃澄波浸太清先皇開鑿擬昆明錦帆不羨揚州路
艣艣誰誇下瀨兵

寄李獻吉二首

一醉洪都金屈卮再陞台海赤霞辭梁王臺上青春月
共折桃花未有期

太史論文戰國同杜陵詩體次王風即看今代詞林伯
未覺前賢采筆雄

贈寄張童子合二首

羨爾伯兄來萬里錦囊詩卷爛珠輝今看十歲能長賦
何用從前咤陸機

麟子鳳雛難可見碧蹄丹喙定堪誇詞源莫倚翻三峽
經筭還須富五車

贈夏敦夫守惠州二首

問子胡為到海陬
仙人共去住羅浮
莫辭荔子開樽酒
無奈梅花繞郡樓

欲採芙蓉贈使君
滿江紅錦漲秋雲
相思莫道音書遠
南海春來有鴈羣

高吏部公次奏績自大江
攜弟入荊州却赴京師
猿聲霜夜憶三巴
姜被凌寒路不賒
直到荊州始分手
將詩徐轉入京華

送徐來秀才

日彩浮金丹闕曉烟光凝翠碧山秋長安舊路天西北
醉裏題詩送客遊

送楊進卿入吳二首

茆堂寄在石湖西麥壠桑田咫尺迷愛爾通家好傾倒
放舟頻過越來溪

出門隨意得青山雲樹秋高滿目斑一醉一醒堪潦倒
不須身掛利名間

贈吳煦

綠樹涼生十畝陰柴門永日少相尋
紉衫不礙跣趺坐石硯聊隨散誕吟

汴中逢殷文儀將赴蒲州省乃兄刺史二首

異域逢君感亂離春殘何處見花枝
江南縱有池臺在不似當年對酒時

河濱垂柳繫行舟坐對青春未解憂
池草萋萋千里夢逢人先自問蒲州

松泉

空林急雨暗蒼煙松下寒泉落澗泉滿耳塵埃湔洗盡
道人中夜不知眠

美人幃子二首

晚多幽思不成粧徙倚閒臺玉漏長明月漸低天杳杳
梅花枝上有新霜

霧縠微涼玉露清銀河西畔水盈盈桂香蟾影秋無限
一曲霓裳萬古情

春燕

綠樹花飛半作泥江南新燕已來齊
雨聲不與幽人約暗送春光出小溪

海棠花

嘉州名花香觸人調朱弄粉淡含春
沉香亭上微醺處可怪君王不忍嗔

梨花

一枝繁雪亞牆東千樹夭桃枉自紅
腸斷不禁明月夜縞衣珠珮倚微風

同文徵仲贈許隱君

一別西湖今幾秋
重搖蘭棹伴君遊
碧山樓閣懸明鏡
壓盡東南數十州

送葉戶部瑞監稅還南都二首

杭州北闕天下通
大艍小艍往來同
寬稅幸逢堯舜理
無人不頌使君功

北峰南峰夾西湖
煙景四時張畫圖
暇日使君搖艇子
新詩的的似明珠

承朱臣策張汝益顧世安自松江送菊至東省謝
以短詩二首

離披五色散秋容
三泖風流得坐逢
好語繁霜知愛惜
寒天留爾伴青松

後圃香雲拂曉臺
吳船新送菊花來
深秋客思渾無賴
野興崢嶸特地開

題周臣畫二首

疊嶂寒松護碧霞
一溪春水夾桃花
山坳若見漁舟入

莫問人間舊歲華

石壁煙霏夏清清水光人影靜分明綸巾羽扇者誰子
來共沙頭賦濯纓


六言

小畫二首

斜日雲橫薄暮空江木落高秋雲外稻梁自足人間矰
繳何求

澤葦江楓共遠玄鳬白鷺爭飛借問漁舟安在欲來垂

釣妄歸



息園存稿詩卷十四